

“САНХҮҮ ЭДИЙН ЗАСГИЙН ИХ СУРГУУЛИЙН ОЮУТНЫ ХОЛБОО” ТББ-ЫН

ҮНДСЭН ДҮРЭМ

Бид, Санхүү эдийн засгийн их сургуулийн оюутнууд, оюутны үйл ажиллагааг хамгийн үр ашигтай байлгахад туслан дэмжих; оюутны үзэл бодол, дуу хоолойг ардчилал, эрх чөлөөний үнэт зүйлс дээр тулгуурлан хүргэх; оюутан бидний зайлшгүй эрхийг зохих ёсны дагуу сургуулийн үйл ажиллагаанд тусгах; сургуулийн эрхэм зорилго, үнэт зүйлсийг хүндэтгэн бэхжүүлэхэд хувь нэмрээ оруулах; хувь хүний эрх чөлөөнд тулгуурласан хариуцлагатай, ухамсартай, ёс суртахуунлаг оюутан болж төлөвшин хөгжих; хувь хүний салшгүй эрх, эрх чөлөөг хамгаалахын тулд Санхүү эдийн засгийн их сургуулийн Оюутны холбоо төрийн бус байгууллагыг байгуулж, Оюутны холбооны Үндсэн дүрмийг ёслол төгөлдөр тунхаглан баталж байна.

1-р зүйл. Нийтлэг үндэслэл

- 1.1.** Санхүү Эдийн Засгийн Их Сургуулийн Оюутны холбоо Төрийн бус Байгууллага /цаашид “Оюутны холбоо” гэх/ нь Оюутны холбооны Үндсэн дүрэмд /цаашид “Үндсэн дүрэм” гэх/ захирагдана.
- 1.2.** Үндсэн дүрмийн зорилго нь Оюутны холбооны үнэт зүйлс, зорилго, үйл ажиллагааны үндсэн чиглэл, зарчим, бүтэц, зохион байгуулалт, санхүү, эрх үүрэг, хүлээх хариуцлагыг тодорхойлж зохицуулахад оршино.
- 1.3.** Үндсэн дүрэм нь Монгол улсын Үндсэн хууль, Төрийн бус Байгууллагын тухай хууль, Дээд боловсролын тухай хууль болон бусад холбогдох хүчин төгөлдөр хууль, тогтоомж, эрх зүйн актад нийцсэн байна. Оюутны холбоо нь дээр дурдагдсан хууль, тогтоомж, эрх зүйн актын биелэлтийг хангахад Оюутны холбооны гишүүний өмнөөс хариуцлага хүлээхгүй.
- 1.4.** Оюутны холбооны бүх шатны байгууллагаас гаргасан эрх зүйн акт, албан бичгүүд нь Үндсэн дүрэмд нийцсэн байна.
- 1.5.** Оюутны холбооны оршин байгаа албан ёсны хаяг, байршил: Монгол улс, Улаанбаатар хот, 13381, Энхтайваны Өргөн Чөлөө – 5, Баянзүрх Дүүргийн 1 дүгээр хороо, СЭЗИС-ийн С байр, 303 тоот өрөө, электрон шуудан: studentunion@ufe.edu.mn
- 1.6.** Оюутны холбооны англи нэрний албан ёсны хөрвүүлэг нь: Student Union of the University of Finance and Economics.
- 1.7.** Оюутны холбоо нь Санхүү Эдийн Засгийн Их Сургууль Төрийн бус байгууллага /цаашид “СЭЗИС” гэх/-ийн оюутны нийтлэг хүсэл эрмэлзлийг илэрхийлсэн, тэдний үүсгэл санаачилгад тулгуурласан, аливаа улс төрийн нам эвсэл болон бусад хөндлөнгийн этгээдээс хараат бус, бие даасан, ашгийн төлөө бус, гишүүдээ үйлчилдэг, СЭЗИС-тай байнгын харилцаа, хамтын ажиллагаа бүхий Төрийн бус байгууллага мөн.
- 1.8.** Оюутны холбоо нь СЭЗИС-ийн бакалаврын зэрэг горилон суралцаж буй өдрийн, болон шаталсан хөтөлбөрийн нийт оюутан /цаашид “Оюутны холбооны гишүүн” гэх/-ы төлөөлөл мөн.

2-р зүйл. Оюутны холбооны үнэт зүйлс эрхэм зорилго

- 2.1.** Оюутны холбооны Эрхэм зорилго нь “Өөрийгөө сэрээж чадсан, нийгмийг соён гэгээрүүлэх үйлсэд хувь нэмрээ оруулахуйц иргэн болон төлөвшихөд оюутнуудаа дэмжин ажиллах”-д оршино.
- 2.2.** Оюутны холбооны Алсын хараа нь “Бүс нутагтаа хүлээн зөвшөөрөгдсөн хөгжилд манлайлан чиглүүлэгч оюутны байгууллага болон хөгжих”-д оршино.

2.3. Оюутны холбоо нь Эрхэм зорилго, үйл ажиллагааны үндсэн зарчмаа илэрхийлэхүйц өөрийн тамга, тэмдэг, бэлгэдэл, туг, үнэмлэх, албан бичгийн загвар, тангаргийн үгтэй байна. Эдгээр зүйлс нь Оюутны холбооны өмч бөгөөд зөвхөн Оюутны холбоо ашиглах эрхтэй.

2.4. Оюутны холбооны Уриа нь “Нэгдэж аваад хөгжье, Хөгжиж аваад тэлье”.

2.5. Оюутны холбооны Эрхэмлэх үнэт зүйлс нь:

2.5.1.Хууль, эрх зүйт ёсыг дээдлэх

2.5.2.Байнга суралцаж, хөгжин дэвших

2.5.3.Харилцан хүндэтгэх

2.5.4.Эрх тэгш хандах, шударга ёсыг дээдлэх

2.5.5.Үүрэг хариуцлагаа ухамсарлах

2.5.6.Хамт олонч, бүтээлч байх

3-р зүйл. Нэр томьёоны тухай

3.1. Энэ дүрэмд хэрэглэсэн дараах нэр томьёог дор дурдсан утгаар ойлгоно.

3.1.1. “Оюутны холбооны гишүүн” гэж Санхүү Эдийн Засгийн Их Сургуулийн бакалаврын зэрэг горилон суралцаж буй Өдрийн, Хамтарсан, Шаталсан болон Солилцооны хөтөлбөрийн оюутныг;

3.1.2.“Оюутны холбооны Удирдах зөвлөлийн гишүүн” гэж Оюутны холбооны чуулганаар сонгогдож мөн уг чуулганаар батламжилсан оюутны холбооны гишүүн.

3.1.3. “Оюутны холбооны сонгуульт албан тушаалтан” гэж Оюутны холбооны Тэргүүн, Удирдах зөвлөлийн гишүүний албан тушаалд сонгуулиар ялалт байгуулж, чуулганаар батлагдсан оюутны холбооны гишүүн;

3.1.4.“Оюутны холбооны томилогдсон албан тушаалтан” гэж Оюутны холбооны Дэд Тэргүүний томилсон албан хаагч нар;

3.1.5.“Оюутны холбооны салбар байгууллага” нь СЭЗИС-ийн Оюутны холбоо болон Оюутны холбооны гишүүдийн үүсгэл санаачилгаар байгуулагдаж, оюутныг хөгжүүлэхэд чиглэгдсэн Оюутны холбоонд харьяалагдах оюутны байгууллага, сайн дурын бүлгэмийг хэлнэ.

4-р зүйл. Үйл ажиллагааны үндсэн чиглэл

4.1. Оюутнуудын эрх ашгийг хамгаалах бодлого боловсруулах

4.2. Оюутантай холбоотой судалгаа шинжилгээ хийх;

4.3. Салбар байгууллагын хөгжлийг хангах, тэдний хамтын ажиллагаа, зохион байгуулалтыг дэмжих, салбар байгууллагаараа дамжуулан нийт оюутны дунд соёл, спорт, урлаг, нийгмийн компанит ажил өрнүүлэх

4.4. Оюутнуудыг тэдний эрх ашиг, хөгжилтэй холбогдох бүх төрлийн мэдээллээр хангах. Үүнд, Оюутны холбооны өөрийн, СЭЗИС-ийн, бусад гаднын байгууллагын, Монгол Улсын хүрээнд гарч буй хууль тогтоомж, тогтоол, шийдвэр гэх мэт.

4.5. Оюутны холбоо өөрийнхөө чадамжийг тасралтгүй сайжруулах

5-р зүйл. Гишүүнчлэл

5.1. Санхүү Эдийн Засгийн Их сургуулийн бакалаврын өдрийн хөтөлбөр болон шаталсан хөтөлбөрийн оюутан нь Оюутны холбооны гишүүн мөн.

5.2. Оюутны холбооны гишүүн дараах бүрэн эрхтэй. Үүнд:

5.2.1. Мэдээлэл авах болон өөрийн санал, гомдол, хүсэлтийг Оюутны холбооны бүх шатны байгууллагад чөлөөтэй илэрхийлэх.

5.2.2. Өөрийн эрх ашиг хөндөгдсөн гэж үзсэн тохиолдолд Оюутны холбоогоор дамжуулан зохих газарт нь хандах.

5.2.3. Бүх шатны салбар байгууллагаас зохион байгуулсан үйл ажиллагаанд

5.2.4. оролцох, хамтарч ажиллах.

5.2.5. Оюутны холбоонд тавьсан хууль, эрх зүйд нийцсэн санал хүсэлтээ хэрэгжүүлэхэд биечлэн оролцох.

5.2.6. Ёс суртахуунлаг байдлыг эрхэмлэн, хууль, эрх зүйг даган мөрдөнө.

5.2.7. СЭЗИС дээр нийтийг хамарсан үйл ажиллагаа зохион байгуулахдаа Оюутны холбоонд мэдэгдэх.

5.2.8. Оюутны холбооноос гарсан шийдвэрийг даган мөрдөж, хэрэгжүүлэхэд идэвхтэй оролцох.

5.3. Үндсэн дүрэмд тусгагдаагүй Оюутны холбооны гишүүнчлэлтэй холбогдох бусад харилцааг тусгай дүрмээр шийдвэрлэнэ.

6-р зүйл. Оюутны холбооны бүтэц

6.1. Оюутны холбоо нь дараах ерөнхий бүтэцтэй байна. Үүнд:

6.1.1. Оюутны Чуулган

6.1.2. Оюутны холбооны Удирдах зөвлөл

6.1.3. Оюутны холбооны Гүйцэтгэх хороо

6.1.4. Оюутны холбооны Хяналтын зөвлөл

6.1.5. СЭЗИС-ийн Клубийн зөвлөл

6.2. Оюутны холбооны албан тушаалтан нь Үндсэн дүрмийн 6.1.1-ээс 6.1.5 -д заасан албан тушаалтан байна.

7-р зүйл. Оюутны холбооны үйл ажиллагаандаа баримтлах зарчим

7.1. Үндсэн дүрэм, түүнд нийцүүлэн гаргасан бусад бүх эрх зүйн актыг чандлан сахиж эрх зүйт ёсыг удиртгал болгоно.

- 7.2. Оюутныг эн тэргүүнд тавьж, тэднийг үл ялгаварлан эрх тэгш хандана.
- 7.3. Оюутны холбооны үйл ажиллагаа олон нийт, бүлгийг хамарсан ил тод нээлттэй явагдана.
- 7.4. Оюутны холбооноос гаргасан шийдвэр оюутнуудын эрх ашигт нийцсэн байна.
- 7.5. Хүний эрх, оюутны эрхийг эрхэмлэн дээдэлнэ.
- 7.6. Шударга ёсыг эрхэмлэж, ёс суртахуунлаг байна.
- 7.7. Оюутнуудыг ардчилсан, сайн дурын үндсэн дээр зохион байгуулна.

8-р зүйл. Оюутны чуулган, түүний бүтэц

- 8.1. Оюутны чуулган нь /цаашид Чуулган гэх/ нь Оюутны холбооны дээд эрх мэдлийг барих бөгөөд Чуулганы төлөөлөгчдөөс бүрдэнэ.
- 8.2. Чуулган нь нэг зуугаас ихгүй төлөөлөгчтэй, нэг танхимтай байна.
- 8.3. Чуулганы бусад бүрэн эрх, зохион байгуулалт, үйл ажиллагааны дэг, Чуулганы төлөөлөгчийн бүрэн эрхийг Оюутны Чуулганы тухай дүрмээр тогтооно. Энэхүү дүрмийг Чуулганаас батална.
- 8.4. Чуулганы нийт төлөөлөгчдийн 2/3 ба түүнээс дээш гишүүд ирсэн тохиолдолд Чуулганыг хүчин төгөлдөрт тооцно.
- 8.5. Хүндэт зочныг Чуулганд урьж болно. Эл асуудлыг Удирдах зөвлөл шийднэ.
- 8.6. Оюутны холбооны Хүндэт гишүүн Чуулганд оролцож үг хэлж болно. Харин санал хураалтад оролцохгүй.
- 8.7. Чуулган дараах бүрэн эрхтэй. Үүнд:
- 8.7.1. Үндсэн дүрэмд нэмэлт, өөрчлөлт оруулах;
 - 8.7.2. Оюутны холбооны ерөнхий төсөв төлөвлөгөө хэлэлцэх, хөгжлийн бодлого, зорилго, тодорхойлох, батлах, нэмэлт, өөрчлөлт оруулах;
 - 8.7.3. Оюутны холбооны хөгжлийн бодлого, зорилго, жилийн төсөв, төлөвлөгөөний гүйцэтгэлийг хэлэлцэн үнэлгээ өгөх;
 - 8.7.4. Оюутны холбооны тамга, тэмдэг, бэлгэдэл, дуулал, тугийг хэлэлцэн батлах;
 - 8.7.5. Оюутны холбооны Тэргүүнийг сонгох, чөлөөлөх;
 - 8.7.6. Оюутны холбооны Удирдах зөвлөлийн гишүүнийг сонгох, чөлөөлөх;
 - 8.7.7. Оюутны холбооны Хяналтын зөвлөлийн гишүүнийг сонгох, чөлөөлөх;
 - 8.7.8. Энэ үед Үндсэн дүрмийн 18-р зүйлийг баримтална.

8.8. Чуулганыг зохион байгуулалтыг Гүйцэтгэх хороо хангах бөгөөд Тэргүүн даргална. Зохион байгуулалттай холбоотой зохицуулалтыг Оюутны Чуулганы тухай дүрмээр зохицуулна.

8.9. Ээлжит Чуулган нь намрын болон хаврын чуулган гэсэн 2 хэлбэртэй байна.

8.10. Чуулганы тов болон хэрхэн зарлах, бусад холбогдох зүйлсийг удирдах зөвлөлийн хурлаар хэлэлцэж шийдвэрлэнэ.

8.11. Хэрэв нийтийг хамарсан цар тахал, үймээн самуун, байгалийн гамшиг тохиолдсон үед оюутны холбооны тэргүүн чуулганы товыг тодорхой хугацаагаар хойшлуулж болно.

/Энэ заалтыг 2020 оны 5 дугаар сарын 30-ний өдрийн Чуулганы төлөөлөгчдийн саналаар нэмсэн/

8.12. Чуулганы товыг 8.11-д заасны дагуу хойшлуулсан бол чуулганаар шинээр сонгогдож буй албан хаагчдын бүрэн эрхийн хугацаанд өөрчлөлт орохгүй.

/Энэ заалтыг 2020 оны 5 дугаар сарын 30-ний өдрийн Чуулганы төлөөлөгчдийн саналаар нэмсэн/

8.13. Ээлжит Чуулганы товыг хуралдахаас ажлын 10 хоногийн өмнө зарлана.

8.14. Ээлжит чуулганаар хэлэлцэх асуудлын жагсаалт болон холбогдох материалыг Чуулган хуралдахаас дор хаяж ажлын 5 хоногийн өмнө Удирдах зөвлөлөөс Чуулганы төлөөлөгчдөд цахим шуудангаар хүргэхийн сацуу олон нийтэд нээлттэй зарлана.

8.15. Чуулганы нийт төлөөлөгчдийн дор хаяж 25% ээлжит бус Чуулган зарлахыг хүсэж Тэргүүнд хүсэлт өргөн баривал, Тэргүүн хүсэлтийг хүлээн авснаас ажлын тав хоногийн дотор ээлжит бус Чуулганы товыг зарлах ба энэхүү тов хүсэлт өргөн барьснаас ажлын 15 хоногоос хэтэрч болохгүй.

8.16. Удирдах зөвлөлийн хурлаар удирдах зөвлөлийн гишүүд нийтээр ээлжит бус чуулган хуралдуулахыг дэмжсэн тохиолдолд ээжит бус чуулганыг 8.13 заасан хугацаанд хуралдуулна.

8.17. Үндсэн дүрэмд өөрөөр заагаагүй бол хүчин төгөлдөр Чуулганы ½-ээс дээш хувийн саналаар асуудлыг шийдвэрлэж, Тэргүүн Чуулганы тогтоол гаргаж, гарын үсэг зурж баталгаажуулна.

9-р зүйл. Удирдах зөвлөл

9.1. Чуулганы чөлөөтэй үед Удирдах зөвлөл Байгууллагын дээд эрх мэдлийг хэрэгжүүлнэ.

9.2. Удирдах зөвлөлийн гишүүд багадаа 5, ихдээ 7-оос хэтрэхгүй байна. Үүнд:

9.2.1. Оюутны холбооны Тэргүүн нь УЗ-ийн гишүүн мөн бөгөөд УЗ-ийн дарга юм.

9.2.2. Клубийн зөвлөлийн тэргүүн нь Удирдах зөвлөлийн гишүүн мөн.

9.2.3. Удирдах зөвлөлийн бусад гишүүнийг Чуулганаас сонгоно.

9.3. Удирдах зөвлөлийн бүрэн эрхийг хугацаа 1 жил байна.

9.4. Удирдах зөвлөл бүрэн эрхээ Удирдах зөвлөлийн хурлаар хэрэгжүүлнэ. Удирдах зөвлөлийн нийт гишүүдийн 2/3 ирц бүрдсэн үед Удирдах зөвлөлийн хурлыг хүчин төгөлдөрт тооцно.

9.5. Удирдах зөвлөл нь дараах бүрэн эрхтэй. Үүнд:

9.5.1. Үндсэнд дүрэмд нийцсэн дүрэм батлах, нэмэлт өөрчлөлт оруулах, цуцлах;

9.5.2. Дэд тэргүүнийг томилох, чөлөөлөх;

9.5.3. Удирдах зөвлөл нь Чуулганы өмнө ажлаа хариуцах;

9.5.4. Дэд тэргүүний өргөн барьсан Байгууллагын жилийн төлөвлөгөө, улирлын төлөвлөгөө, төсвийг хэлэлцэж, батлах;

9.5.5. Энэ дүрмийн 11.4.3 -д дурдсан бодлого, нарийн төлөвлөгөө, төсөвт нэмэлт, өөрчлөлт оруулах саналыг хэлэлцэж, батлах;

9.5.6. Байгууллагын батлагдсан жилийн төлөвлөгөө, улирлын төлөвлөгөө, Байгууллагын төсвийн хэрэгжилтийг хянах;

9.5.7. Чуулганы төлөөлөгчдийн дунд санал асуулга явуулах. Чуулганы төлөөлөгчдийн олонх нь оролцсон санал асуулгыг хүчинтэйд тооцож, олонхын санал авсан асуудлыг Удирдах зөвлөлийн шийдвэр гэж үзнэ.

9.5.8. Дэд тэргүүний томилсон Нарийн бичгийн дарга болон санхүүчийн томилгоог баталгаажуулах;

9.5.9. Оюутны холбооны хүндэт гишүүнийг хэлэлцэж батлах;

9.6. Удирдах зөвлөлийн ээлжит хурал хоёр долоо хоногт нэг хуралдана.

9.7. Удирдах зөвлөлийн анхны хурал, ээлжит болон ээлжит бус хурлыг зарлах, хурлын дэг, дотоод зохион байгуулалт, бүрэн эрхээ хэрэгжүүлэхтэй холбогдох харилцааг Удирдах зөвлөлийн тухай дүрмээр тогтооно.

10-р зүйл. Оюутны холбооны Тэргүүн

10.1. Оюутны холбооны Тэргүүн нь /цаашид Тэргүүн гэх/ нийт оюутны элч төлөөлөгч мөн бөгөөд Удирдах зөвлөлийн дарга юм. Тэргүүнийг Чуулганаас сонгох бөгөөд бүрэн эрхийн хугацаа нь 1 жил байна.

10.2. Оюутны холбооны Тэргүүн нь дараах бүрэн эрхтэй. Үүнд:

10.2.1. Удирдах зөвлөлийг даргалах;

10.2.2. Оюутны Чуулганы даргалах;

10.2.3. Оюутны холбоог гадаад, дотоодод төлөөлөх;

10.2.4. Чуулганы өмнө ажлаа хариуцаж, тайлагнах;

10.2.5. Оюутны холбооны хөгжлийн бодлого, жилийн төлөвлөгөө, улирлын төлөвлөгөө, төсвийн гүйцэтгэлийн тайлан мэдээг нийт оюутнуудад хандаж тайлагнах;

10.2.6. Оюутнуудыг төлөөлж СЭЗИС-ийн Удирдах зөвлөлийн гишүүнээр ажиллаж, түүнээс гарсан шийдвэрийн талаар оюутнуудад цаг тухайд нь мэдээлэх;

10.2.7. Оюутанд тулгамдсан түгээмэл асуудлын хүрээнд нийт оюутнуудыг төлөөлөн СЭЗИС-ын Ректортой уулзаж, шийдвэр гаргуулах;

10.2.8. Оюутны эрх ашгийг хамгаалж, хууль ёсны дагуу хэлсэн үг, хийсэн үйлдэлдээ хувь хүн, оюутны үүднээс дарамт шахалтад өртөхгүй, халдашгүй байна.

10.3. Тэргүүний бусад бүрэн эрх, үйл ажиллагаатай холбоотой харилцааг Удирдах зөвлөлийн тухай дүрмээр зохицуулна.

11-р зүйл. Гүйцэтгэх хороо

11.1. Оюутны холбооны Гүйцэтгэх хороо / цаашид ГХ гэх/ дараах бүрэлдэхүүнтэй. Үүнд:

11.1.1. Дэд тэргүүн

11.1.2. Нарийн бичгийн дарга

11.1.3. Санхүүч

11.1.4. Албаны дарга нар

11.2. Оюутны холбооны Дэд тэргүүн нь /цаашид Дэд тэргүүн гэх/ Оюутны холбооны гүйцэтгэх дээд албан тушаалтан мөн.

11.3. Дэд тэргүүнийг Удирдах зөвлөлөөс томилох ба бүрэн эрхийн хугацаа нь нэг жил байна.

11.4. Дэд тэргүүн дараах бүрэн эрхтэй. Үүнд:

11.4.1. Үндсэн дүрмийн хэрэгжилтэд бүрэн хариуцлага хүлээх;

11.4.2. Гүйцэтгэх хороог даргалах;

11.4.3. Оюутны холбооны хөгжлийн бодлого, жилийн төлөвлөгөө, улирлын төлөвлөгөө, төсвийг боловсруулж Удирдах зөвлөлөөр батлуулах;

11.4.4. Шаардлагатай тохиолдолд Оюутны холбооны хөгжлийн бодлого, жилийн төлөвлөгөө, улирлын төлөвлөгөө, төсөвт нэмэлт, өөрчлөлт оруулах саналыг боловсруулах;

11.4.5. Оюутны холбооны батлагдсан хөгжлийн бодлого, жилийн төлөвлөгөө, улирлын төлөвлөгөөний хэрэгжилтийг хангах;

11.4.6. Оюутны холбооны хөгжлийн бодлого, жилийн төлөвлөгөө, улирлын төлөвлөгөө, төсвийн гүйцэтгэлийн тайлан мэдээг Удирдах зөвлөлд хандаж тайлагнах;

11.4.7. Оюутны холбооны санхүүгийн анхан шатны баримтад нэгдүгээр гарын үсэг зурах;

11.4.8. Дэд тэргүүн бүрэн эрхээ хэрэгжүүлэхийн тулд зохион байгуулалтын бүтэц үүсгэж, бүрэн эрхийг нь тодорхойлох;

11.4.9. Дотоод дүрэм, стандартыг санаачилж, УЗ-д өргөн барьж, хэлэлцүүлэх, батлуулах.

11.5.Оюутны холбооны Нарийн бичгийн дарга /цаашид НБД гэх/ нь Оюутны холбооны дотоод хэрэг эрхэлсэн ахлах албан тушаалтан юм. Нарийн бичгийн даргыг Дэд тэргүүн томилж, УЗ-өөс баталгаажуулна.

11.6.Нарийн бичгийн дарга нь дараах бүрэн эрхтэй. Үүнд:

11.6.1. Оюутны холбооны бүх шатны баримт бичиг, мэдээллийг хариуцаж, ил тод байдлыг хангах;

11.6.2. Сонгуулийн түр хороог даргалах. Хэрвээ НБД өөрөө сонгуульт албан тушаалд дэвшиж байгаа бол түүнийг орлох хүнийг Дэд тэргүүн томилж, УЗ-өөр баталгаажуулна.

11.6.3. Удирдах зөвлөлийн хурлыг зохион байгуулах бэлтгэл, танхим, техник хэрэгслийг хариуцах;

11.6.4. Чуулганыг зохион байгуулах бэлтгэл, танхим, техник хэрэгслийг хариуцах;

11.7.Оюутны холбооны Санхүүч нь /цаашид Санхүүч гэх/ санхүүгийн ахлах албан тушаалтан мөн. Санхүүчийг Дэд тэргүүн томилж, УЗ-өөс баталгаажуулна.

11.8.Санхүүч нь дараах бүрэн эрхтэй.

11.8.1. Оюутны холбооны санхүүг хариуцаж, ил тод байдлыг хангах;

11.8.2. Оюутны холбооны анхан баримтад хоёрдугаар гарын үсэг зурах;

11.8.3. Оюутны холбооны санхүүгийн тайлан гаргаж, холбогдох хуулийн дагуу зохих төрийн байгууллагад тайлагнах;

11.9.Гүйцэтгэх хорооны бусад бүрэн эрх, зохион байгуулалттай холбогдох харилцааг Гүйцэтгэх хорооны тухай дүрмээр нарийвчлан зохицуулна.

12-р зүйл. Оюутны холбооны Хяналтын зөвлөл

12.1. Оюутны холбооны маргааныг эцэслэн шийдвэрлэх эцсийн эрх мэдлийг гагцхүү Оюутны холбооны Хяналтын зөвлөл / цаашид ХЗ гэх/ хэрэгжүүлнэ.

12.2. Хяналтын зөвлөл нь 3 гишүүнтэй байна.

12.3. Хяналтын зөвлөлийн гишүүнийг Чуулганаас сонгоно.

12.4. Хяналтын зөвлөлийн бүрэн эрхийг хугацаа 1 жил байна.

12.5. Хяналтын зөвлөл нь дараах маргааныг хянан шийдвэрлэнэ. Үүнд:

12.5.1. СЭЗИС-ийн оюутан ба Оюутны холбооны холбооны албан хаагч хоорондын;

12.5.2. Оюутны холбоо ба СЭЗИС-ийн оюутан хоорондын;

12.5.3. Оюутны холбооны албан хаагч, алба бүтэц хоорондын;

- 12.5.4. Оюутны холбооноос гаргасан аливаа дүрэм, шийдвэр нь Үндсэн дүрэмд нийцтэй эсэх;
- 12.5.5. Үндсэн дүрэмтэй холбогдох бусад бүх асуудлууд;
- 12.5.6. Сонгуультай холбогдсон аливаа маргааныг Хяналтын зөвлөл эцэслэн шийдвэрлэнэ.
- 12.6. Хяналтын зөвлөлийн шийдвэр аливаа маргааны эцсийн шийдвэр байх бөгөөд түүнийг холбогдох бүх этгээд заавал биелүүлнэ. Хяналтын зөвлөл шийдвэрээ гүйцэтгэхэд шаардлагатай нарийвчилсан зааварчилгаа гаргах эрхтэй. Хяналтын зөвлөлөөс гаргасан шийдвэрийг биелүүлэх үүргийг Удирдах зөвлөл хүлээнэ.
- 12.7. Бүх маргаан шийдвэрлэх хурал нээлттэй явагдана. Маргаан шийдвэрлэх хурлын өмнө эсвэл хурлын үеэр хуралд оролцож буй бүх Хяналтын зөвлөлийн гишүүд маргааныг олон нийтийн өмнө нээлттэй шийдвэрлэх нь хуралд сөрөг нөлөөтэй гэж үзэж зөвшөөрвөл хурлыг хаалттай явуулж болно. Хяналтын зөвлөлийн гишүүдийн олонхын саналаар хурлыг ахин нээлттэй явуулж болно.
- 12.8. Үндсэн дүрэмд тайлбар хийх эрх нь гагцхүү Хяналтын зөвлөлд хадгалагдана.
- 12.9. Хяналтын Зөвлөлийн зохион байгуулалт, маргаан шийдвэрлэх үйл явц, холбогдох бусад харилцааг Хяналтын зөвлөлийн тухай дүрмээр шийдвэрлэнэ. Хяналтын зөвлөлийн тухай дүрмийг Чуулган батална.

13-р зүйл. Оюутны холбооны санхүү

- 13.1. Оюутны холбооны санхүүжилт нь дараах эх сурвалжаас бүрдэнэ. Үүнд:
- 13.1.1. Санхүү эдийн засгийн их сургуулийн төсөвт төлөвлөсөн санхүүжилт. Энэхүү санхүүжилтийн асуудлыг СЭЗИС ба Оюутны холбооны хамтын санамж бичигт нарийвчлан зохицуулна;
- 13.1.2. Олон нийтэд зориулсан зарим төлбөртэй үйл ажиллагаанаас олох орлого;
- 13.1.3. Оюутны холбооны үйл ажиллагааг ивээн тэтгэгч байгууллага, хувь хүний сайн дурын хуримтлал, хандив, дэмжлэг, тусламж;
- 13.1.4. Ажил үйлчилгээ, тодорхой төсөл хэрэгжүүлэхэд гадаад, дотоодын төрийн ба төрийн бус байгууллага, бизнесийн байгууллагуудаас өгсөн санхүүжилт, бусад эх үүсвэр.
- 13.2. Хөрөнгө санхүүгийн зарцуулалтад санхүүгийн эх үүсвэр олгогч субъект, байгууллага, хуулийн этгээд хяналт тавина.
- 13.3. Оюутны холбооны санхүүгийн харилцаа, тайлан нь Монгол Улсын холбогдох бүх хууль тогтоомжид нийцтэй байх бөгөөд энэ үүргийг Дэд тэргүүн хангаж хариуцна.
- 13.4. Байгууллагын санхүүгийн төлөвлөлт, тайлан, мэдээлэл нь бүх оюутнуудад нээлттэй, ил тод байх бөгөөд Дэд тэргүүн хангаж хариуцна.
- 13.5. Санхүүтэй холбоотой нарийн зохицуулалт, зохион байгуулалтыг холбогдох дүрмүүдээр нарийвчлан тусгана.

14-р зүйл. Сонгууль

- 14.1. Оюутны холбооны сонгуульт албан тушаалд нэр дэвших үедээ нэр дэвшигч дараах нөхцөлийг хангасан байх ёстой. Үүнд:
- 14.1.1. Санхүү эдийн засгийн их сургуулийн өдрийн ба шаталсан ангийн оюутан байх;
 - 14.1.2. Улирлын чөлөө аваагүй байх;
- 14.2. Сонгууль жил бүрийн Хаврын Чуулганы үеэр зохион байгуулагдана.
- 14.3. Сонгуулийн түр хороог сонгуульд нэр дэвшээгүй ГХ-ны хоёр албан хаагч болон Нарийн бичгийн даргын бүрэлдэхүүнтэйгээр Дэд тэргүүн томилно. Нарийн бичгийн дарга нэр дэвшиж байгаа бол Тэргүүн өөр хэн нэгэн ГХ-ны нэр дэвшээгүй гишүүнийг Сонгуулийн түр хорооны даргаар томилно.
- 14.4. Сонгуулийн түр хороо дараах зарчмыг зайлшгүй баримтална. Үүнд:
- 14.4.1. Сонгуулийн санал хураалтын явцад хамгийн их санал авсан нэр дэвшигчийг тухайн албан тушаалд сонгогдсон гэж үзнэ.
 - 14.4.2. Хэрвээ сонгогдох албан тушаалтын сүүлчийн эрэмбэ дээрх нэр дэвшигчдийн хооронд санал тэнцвэл, тэдгээр нэр дэвшигчдийн хооронд хоёрдугаар шатны санал хураалтыг шууд явуулна;
 - 14.4.3. Сонгуулийн саналыг далд хэлбэрээр хураах ба саналын хуудсанд түдгэлзэх гэсэн сонголтыг зайлшгүй оруулна. Түдгэлзэх санал нь аль ч нэр дэвшигчийг дэмжихгүй байгааг илэрхийлнэ.
- 14.5. Сонгуультай холбоотой бусад нарийн зохицуулалтыг Сонгуулийн тухай дүрмээр зохицуулна.

15-р зүйл. Албан тушаалаас чөлөөлөх

- 15.1. Сонгогдсон албан тушаалтан өөрийн албан үүргээ ямарваа нэг шалтгааны улмаас гүйцэтгэж чадахгүй болж, үүнийгээ мэдэгдсэн тохиолдолд Тэргүүн бүх оюутанд уг албан тушаал эзэнгүй болж байгааг мэдэгдэнэ. Хэрвээ Тэргүүний албан тушаал эзэнгүй болбол энэ үүрэг Дэд тэргүүнд шилжинэ.
- 15.2. Албан тушаал эзгүй болсон тухай албан ёсоор мэдэгдсэнээс хойш ажлын арван тав хоногийн дотор тухайн албан тушаалтныг шинээр сонгох сонгуулийн үйл ажиллагааг явуулна.
- 15.3. Чуулганы төлөөлөгчдийн дор хаяж 25% хувь нь гарын үсгээ зурж сонгогдсон албан тушаалтныг чөлөөлөх санал хураалтыг явуулах эрхтэй.
- 15.3.1. Уг саналыг Тэргүүнд өргөн барих бөгөөд тэрээр уг саналын бичиг хүчин төгөлдөр эсэхийг нягтлан үзнэ. Хэрвээ Тэргүүний албан тушаал чөлөөлөх тухай санал байвал энэ үүрэг Дэд тэргүүнд шилжинэ.
 - 15.3.2. Саналын бичиг хүчин төгөлдөрт тооцогдсон бол ажлын тав хоногт багтаан уг албан тушаалтныг чөлөөлөх санал хураалтыг явуулж нийт сонгогчдын $\frac{1}{2}$ доошгүй саналаар албан тушаалтныг албанаас чөлөөлнө.
- 15.4. Томилогдсон албан тушаалтныг томилсон этгээд эргүүлэн татах эрхтэй.

16-р зүйл. Үндсэн дүрэмд нэмэлт, өөрчлөлт оруулах

- 16.1. Чуулганы төлөөлөгчдийн дор хаяж 25% нэгдэн нийлж Үндсэн дүрмийн нэмэлт, өөрчлөлтийн санал, түүний үндэслэл тайлбараа Тэргүүнд өргөн барьснаас хойш ажлын 15 хоногийн дотор тухайн өөрчлөлтийг батлах эсэхийг Чуулганаар хэлэлцүүлнэ.
- 16.2. Чуулганы нийт төлөөлөгчдийн ½-ээс дээш саналаар Үндсэн дүрэмд нэмэлт, \ өөрчлөлт орсонд тооцож, Удирдах зөвлөл тогтоол гаргана.
- 16.3. Удирдах зөвлөлийн тогтоол гарснаас хойш 15 хоногийн дотор хуулийн этгээдийн улсын бүртгэлд дүрмийн өөрчлөлтийг бүртгүүлснээр хүчин төгөлдөр болно.

17-р зүйл. Өөрчлөн байгуулах, татан буулгах

- 17.1. Оюутны холбоог татан буулгах тухай шийдвэрийг Чуулганы бүх төлөөлөгчдийн энгийн олонхын саналд үндэслэн Удирдах зөвлөл татан буулгана.
- 17.2. Оюутны холбоо Үндсэн дүрмийнхээ зорилгод нийцээгүй үйл ажиллагаа явуулсан эсвэл хууль тогтоомжийг ноцтой буюу удаа дараалан зөрчсөн бол Оюутны холбоог Монгол Улсын эрх бүхий байгууллага, Монгол Улсын шүүх албадан татан буулгана.
- 17.3. Оюутны холбоог өөрчлөн байгуулсан эсвэл татан буулгасан тохиолдолд үүсэх харилцааг Монгол Улсын хууль тогтоомжийн дагуу шийдвэрлэнэ.
- 17.4. Өөрчлөн байгуулсан болон татан буулгасан тухай мэдээллийг олон нийтэд мэдээлнэ.

18-р зүйл. Дүрэм хүчин төгөлдөр болох

- 18.1. Үндсэн дүрмийг 2019 оны 08 дугаар сарын 21-ны өдрөөс эхлэн дагаж мөрдөнө.
- 18.2. Чуулганы төлөөлөгчид энэхүү Үндсэн дүрмийг санал нэгтгэйгээр сайшаан бүтээв. Чуулганаас сонгогдсон Удирдах зөвлөлийн гишүүд бид үүнийг гэрчлэн гарын үсгээ зурав.